

## SU PISITU CUN IS STIVALIS

In dd'una bidde atesu atesu ddoi  
biviàt unu omineddu bèciu bèciu.

Issu fadiat de mestieri su molinàrgiu e  
teniat tres fillus. Sigomenti fut bèciu,  
iat decèdiu de non traballai prus e iat  
pentzau de donai totu su chi teniat a is  
fillus. E aici iat divèdiu is cosas suas: a  
su fillu mannu iat lassau su molinu; a su  
mesanu su burrincu; a su piticheddu, non  
tenendu atru, dd'iat donau su pisitu. A  
custu fillu pitiu ddi narànt Marcu e fut  
sèmpiri tristu e mortificau po sa  
situazioni cosa sua. Su pisitu, scedau,  
fut mortificau prus de su merixeddu; si

ingarrutzàt acanta e ddi naràt: «Caru su merixeddu miu! Non ti disisperis ca tui as fatu unu afàriu a tenni a mei. Tui procuramì unu capeddeddu e una pariga de stivalis: as a beni a biri ca diventas su prus arricu de sa terra». Su merixeddu aici iat fatu. Su pìsitu, totu allìprutzìu cun capeddu e stivalis, si presentat a domu de su Rei ca teniat una filla bella meda. Si fait annuntziai:

«Saludi, su Rei! Custas funt duas perdixis chi ddi mandat su meri miu, su marchesu de Caravat».

Su Rei arrespundit:

«Oh ddi torrit gràtzia, gràtzia meda».

Apustis de una pariga de diis pigat unu sirboneddu e torrat a andai de su Rei chi

ddi torrat gràtzias meda e mandat fintzas is saludus a su marchesu de Caravat.

Su pisitu, currendi, torrat a domu e tzèrriat a su merixeddu:

«Beni cun mei; spolladì e ghetadinci a frùmìni».

Su merixeddu non fut de cussa idea, perou iat postu menti a su pisitu e ghetau si nci fut a s'àcua frida. Passat unu minuteddu o duus, candu intendit su tzichìrriu de una carrossa. Càstiat e fut su Rei. Su pisitu, ca fut atonciàu asuta de s'erba, cun dd' unu brìchidu si ponit anantis de sa carrossa, e a tzèrrius:

«Agitòriu! Agitòriu! Ca ant

dorrubau a su meri miu e nci dd'ant  
ghetau a frùmmini».

Su Rei, ca iat connotu ca cussu  
fut su pisitu chi dd'iat portau is  
perdixis e su sirboni puru, iat cumandau a  
is serbidoris de curri allestru a su palàtziu  
po ddi pigai bistiris nous. Candu fut beni  
bistiu e cratzàu, merixeddu e pisitu  
setzint in sa carrossa cun su Rei e sa  
filla.

Su pisitu, abistu, iat apariciau su  
mori: iat nau giai a is messàius chi fiant  
traballendi in cussas terras:  
«Chi calincunu si pregontat,  
arrespundèi ca custas terras funt de su  
Marchesu de Caravat, ca non si nd'eis a

pentìri».

E diaici fut sutzèdiu: su Rei cun sa filla iant a lestru pregontau. E is messàius ddis iant torrau sceda aici: «Funt de su Marchesu de Caravat».

Su meri po diaderus de cussas terras, invècias, fut unu òmini de trassas malas chi si papàt mannus e pipìus e duncas fut unu orcu. Biviat in dd'unu grandu palàtziu e non dd'interessat nudda de sa domu de su Rei. Ma is tzaracus cosa sua ddu timiant a frùsua.

Su pisitu, candu iat biu cussu palàtziu, iat pentzau: «Custu est su palàtziu po su merixeddu cosa miu».

Ghetau si nd'est de sa carrossa e nc'est intrau in sa domu de s'orcu.

«Saludi!».

«Saludi a tui!».

«E ita est fadendi de bellu,  
mratzèi Orcu?»

«Seu spassiendimì!».

«E ita fait de bellu po si spassiài?»

«Fatzu giogus de prestìgiu».

«Ih! Fatzamiddus biri a mimi puru!!»

«E ita iast a bolli biri? Càstia comenti mi  
fùrriu a lioni deu!» E s'orcu si fùrriat a  
lioni po fai spantai su pìsitu, e ddi narat:

«Ti praxu?». «No! - arrespondit su pìsitu  
– Ses tropu mannu e no aciùngiu mancu  
a ti tocai. Fai una cosa: scumitu ca no  
ses bonu a ti furriài a topi!».

«Chi ti dd'at nau?».

S'orcu donat una trodobobada e su

topixeddu cumentzat a curri po totu  
su palàtziu. Su pìsitu, lestru lestru,  
cun dd' unu brinchidu cassat su topi e nci  
ddu calat in dd'unu unconi feti.

Aici s'iat papau s'orcu furriau a topi.

No at acutu mancu a nci calai  
s'unconi, ca càstiat sa bia e intendit su  
tzichìrriu de sa carrossa; ponit origa:  
custu est su Rei cun su merixeddu miu!  
E bessit allestru a foras, frimat sa  
carrossa e narat:

«Su Rei, tèngiu s'onori de ddu  
cumbidai, impari a sa filla, a intrai in  
domu de su Marchesu de Caravat.  
Beru, su Marchesu, ch'est prexau  
vissignoria puru».

«Certu ca seu prexau!»

arrespondit su merixeddu.

E imbucant totus impari aintru de su palàtziu. Comenti iant postu is peis aintru, fiant abarraus spantaus de tanti arrichesa. E su Rei iat arringratziau a au Marchesu po sa gentilesa cosa sua. Ma su Marchesu si fut amoraui de sa principessa e dd'iat domandada a isposa. Sa principessa iat nau a lestru ca giai. Apustis de tres mesis si fiant coiaus cun dd'una festa manna meda. E su Marchesu arringraziat dònna d'ii su babbu ca dd'iat donau in ereditadi cussu pisitu intelligenti e assotau chi dd'iat fatu agatai domu, pobidda e arrichesa. E iant bìviu impari po totu sa vida.